

新安炭

元

地230135  
(225)  
=1-11  
部四

新安志

新安縣志卷之五  
地理志

新安志序

新安在秦漢爲黟歙二縣漢末別於丹陽以自爲郡其山川風土則已見於中古矣漸江之水出於鄣山則章亥之所步禹之所錄也桐汭之地爲黟故境則楚子西子期之所爭上明之所記也至於漢氏兩以疏封骨肉爲諸侯王國又丹陽都尉之所理會稽太守之所遁皆班班著見至梁蕭幾爲新安太守愛其山水始爲之記又有王篤新安記唐有歙州圖 國朝太平興國中詔編廣記往往

新安志

羅序

一

摭取之至大中祥符中頒李宗諤所修新圖經於天下則由前諸書廢不顯而官府頃罹睦寇又失祥符所頒特抄取計簿益之以里魁亭父之所隱實者編以爲冊餘五六十年矣私竊悼之間因閱前史及國典并雜家稗說有及此者稍稍附著後得祥符圖經於民間則綱目粗設益訪故老求遺事思輯爲一書然未果就會邦君趙侯聞之勉使卒業約敕諸曹遇咨輒報且諭屬縣網羅金石之文使得輔成其說而書出矣夫所爲記山川道里



者非以示廣遠也務知險易不忘戒也其錄丁口  
頃畝非以覽富厚也務察息耗毋繇奪也其書賦  
貢物產非以給嗜欲也務裁閹陋同民利也至於  
州土沿革吏治得失風俗之媿惡與其人材之衆  
寡是皆有微旨必使涉於學者纂之自上世九州  
之志與三墳五典偕號爲帝王遺書而禹貢職方  
氏孔子定之以爲經若直抄取計簿以爲書則凡  
吏之善書者足以次之矣其施於事也亦然若直  
據令甲以爲治則凡吏之母害者足以聽之矣蓋  
新安志

羅序

二

世常以此爲無事乎儒而儒亦卒不可廢於世也  
豈特此哉凡十卷名曰新安志侯帝室之胄父子  
昆季皆以文學取第其爲政廉靖不擾人亦相與  
安之且去猶惓惓於吾土思欲表章之蓋有不可  
忘者矣

淳熙二年三月癸未郡人羅願序

新安志序

徽爲郡自漢始至於今久矣圖經紀述其事宜詳也試考之則遺闕而不備讀者恨焉此新安志所以作也不悔昔將承乏此州而吏以圖經先至見其疎略即有意於補次一日對衆客語之客言新章貢倅羅君蓋志存於此者訪拾編摩蒐取附益用心勤且舊矣僕爲驚喜因請之卒業成一家書以表見於時於是新安志出焉上下千載閒博采詳摭論正得失皆有據依釐爲十卷凡山川道里之險易丁口頃畝之息耗賦貢物產之闊狹以至州土吏治風俗人材皆條理錯綜聚見此書曾無遺者嗚呼可謂盛也羅君以儒學蚤馳雋聲惟其博物洽聞故論載甚廣而其敘事又自得立言之法讀者必能辨之趙不悔序

新安志

趙序

一

重刊新安志序

新安山郡也其山西北自嶺嶠下而出於休婺之間者曰率山登高視之黃山齊雲巍峩皆若有遜山水東流為浙江歸震川汉口志序所稱率山之水北與練溪合為新安江過嚴陵灘入錢塘者也其西流者一由祁門達浮梁一由婺

序

一

源達鄱陽為廬江水山海經曰三天子鄣在閩西海北亦謂之三天子都浙江廬江皆出焉酈元本之為水經注準今率山地望適合而郭璞謂三天子都為歙東玉山則以今績溪大鄣山當之誤也余因思秦於此立鄣郡蓋取義三天子鄣為最古而自來說地理者云秦以

大鄆名郡又非也漢更鄆曰丹陽其所  
屬黟歙二縣迺得後世新安全郡地孫  
吳別為新都郡晉太康中改新安至宗  
仍其名羅鄂州始為之志觀其敘述有  
體徵引賅備多補前史志傳之闕洵攷  
古者不可少之書矣自秦漢迄今郡邑  
割并不常沿革回惑而吾徽州一府適

## 序

二

符宋代新安屬地之數余又性好游覽  
老耽詞翰念文獻之不可無徵而是書  
之為山水增重也爰重刊而序之如此  
光緒十三年十月古黟李宗燭謹敘

新安志云休甯率山高五十七仞歙縣黃山  
高千百八十仞同治中新修安徽省志云率  
山高千數百仞黃山高三千七百餘丈康熙  
間休甯趙吉士所纂徽州府志則云黃山高

千百八十仞率山高千四百餘仞據此率高  
於黃與二志異案府志言率山為江南祖山  
鄱浙二水源於此由五嶺西北來周百餘里  
地勢最高省志說略同是新安志謂鄰郡諸  
山為黃山支派者非也且新安志云江南諸  
大山有天目天台之屬天台高萬八千丈而  
低於黃山新安郡之平地已與天目天台二  
山等即此推之休甯地望視歙逾上率高黃  
下瞭然易明又不必較量於數百仞間矣余

# 序

三

疑志言率山五十七仞蓋鄂州臆測之若遊  
跡所到必不為是言否則所記仞數傳刻誤  
也 國朝輿地之學遠邁前古二山高下當  
以今志為準趙係郡人所為書較新修省志  
尤精密今參定從之宗燭又識



新安志目錄

新安羅願撰

第一卷

州郡

沿革 分野 風俗 封建 境土 治  
所 城社 道路 戶口 姓氏 坊市  
官府 廟學 貢院 放生池 館驛

新安志

目錄

一

倉庫 刑獄 營寨 郵傳 祠廟

第二卷

物產

穀粟 蔬茹 藥物 木果 水族 羽  
族 獸類 畜擾 貨賄

貢賦

稅則 雜錢 夏稅物帛 小麥 秋稅  
糙米 折帛錢 進貢 供物帛 上供  
紙 酒課 稅課 茶課 鹽課 公用

第三卷

歙縣

沿革 縣境 鄉里 戶口 田畝 租

稅 酒稅 城社 官廨 鎮寨 道路

橋梁 津渡 山阜 水源 古跡

祠廟 道觀 僧寺 上墓 碑碣 賢

宰

第四卷

休寧

五縣事目略如歙縣

新安志

目錄

二

祁門

第五卷

婺源

績溪

黟縣

第六卷

先達

程儀同 程都督 吳御史 王校正

汪處士 舒狀元 呂侍郎 大魏太尉

查秘監 張度支 許司封 謝諫議  
張密學 小魏太尉 查賢良 俞待  
制 俞侍郎 洪比部 聶內翰 許待  
制 許長官 呂狀元 孫工部

第七卷

先達

王提刑 汪宣德 洪尚書 胡金部  
胡司業 黃侍御 汪丞相 程顯學  
凌待制 汪內翰 胡待制 汪少卿

新安志

目錄

三

胡殿院 先君尚書 朱吏部 汪樞密  
金尚書

第八卷

進士題名

賢良方正一人 進士貢士二百三十四  
人 明經二人 發運使賜第二人 樂  
成獻頌並銓試賜第共四人 貢士獻策  
一人 特奏名三十三人 武舉四人

義民

黃芮 章氏二女 汪延美 葉氏女  
詹惠民

仙釋

方儲 許宣平 聶師道 聶紹元 丘  
寺丞 鄭姑 程惟象 張擴 智琚  
定莊 茂源 謙禪師 瀾大德 雪山  
子 宣道者 宗白頭

第九卷

牧守

新安志

目錄

四

吳五人 晉三人 宋十二人 齊五人  
梁十三人 陳五人 唐三十五人  
吳楊氏三人 南唐一人 國朝宣和前  
二十九人 宣和後見壁者三十六人

第十卷

雜錄

人事 詩話 雜藝 硯 紙 墨 定  
數 神異 記聞

新安志目錄

族裔孫鳳翥校字

新安志卷第一

新安羅 願 撰

州郡沿革

徽州新安郡軍事禹貢職方氏揚州之南境春秋時屬吳吳亡屬越越滅屬楚秦并天下置黟歙二縣屬鄣郡漢武帝元封二年改鄣郡曰丹陽而使都尉分治于歙成帝鴻嘉二年以黟爲廣德王國

新安志

卷一

一

立中山憲王弟孫雲客於此三年薨無子地入於漢平帝元始二年復以爲廣德王國立廣川惠王曾孫倫爲王傳子赤王莽篡位貶赤爲公明年廢而改黟曰愬鹵光武中興復爲黟獻帝建安十三年吳主孫權遣威武中郎將賀齊定黟歙分歙爲始新新定黎陽休陽并黟歙爲六縣遂割於丹陽置以爲新都郡其後避嗣主孫休諱改休陽爲海宣晉武帝太康元年平吳以黟之廣德故國爲廣德縣隸宣城郡

何承天宋志稱廣德漢舊縣沈約以爲二漢志並無之疑是吳所立按吳志曰蒙領廣德長吳錄張

純補廣德令則廣德在吳為縣矣然不知所屬至晉書乃顯隸宣城云

改新都郡曰新安改新

定縣曰遂安宋大明八年省黎陽併入海寧止領縣五梁武帝普通三年割吳郡之壽昌來屬復為六縣自秦漢鄣丹陽及吳新都晉新安皆隸揚州宋孝建元年分揚州之會稽東陽新安永嘉臨海五郡為東揚州自後或併或分梁元帝承聖中分海寧黟歙三縣更置黎陽合四縣立新寧郡與新安並正屬揚州陳省新寧郡及黎陽縣而新安復屬東揚州

祥符經云天嘉三年省新寧郡按陳書天嘉四年以新安新寧八郡置東揚州則三年初未嘗省要是陳省之耳

新安志

卷一

隋開皇九年改郡為歙州改始新縣曰新安縣又併遂安及梁所割吳郡壽昌未屬者皆入新安縣以隸婺州於是縣之存者黟歙海寧三縣而州治黟仁壽三年取婺州之新安并復立遂安以隸睦州於是二縣故地迄今不復今嚴州淳安遂安是也大業初復以歙州為新安郡治休寧義寧中治歙武德元年例改郡為州太守為刺史四年越國公納歙於是因其境土以歙州為總管府使持節總管歙宣杭睦婺饒等六州諸軍事未幾改命王

雄誕爲使總管歙睦衢三州七年二月例改都督府正觀元年罷都督府永徽五年析歙縣置北野縣開元二十八年正月九日析休寧置婺源縣永嘉元年盜方清陷州州民拒賊保休寧之山險二年賊平因析置歸德縣又以平方清因其壘析黟及饒州之浮梁置祁門縣又以宣州旌德寇王萬敵平析歙之古華陽鎮置績溪縣而北野歸德二縣至大曆五年省於是州復統六縣元和六年九月升上州自罷督府後或隸揚潤二州或屬浙江

新安志

卷一

三

江西道節度及宣歙觀察團練使天祐二年刺史陶雅以楊氏承制拜歙婺衢睦四州都團練觀察處置等使唐亡吳楊氏南唐李氏相繼有之皇朝開寶八年下江南於是始復得共職貢於天子隸江南東路爲望宣和三年五月二十四日詔改歙州爲徽州

分野

禹貢淮海維揚州周禮東南曰揚州而不言所直之宿漢地理志吳地斗分野也粵地牽牛婺女之

分野也而丹陽等郡盡吳分也郡在漢爲丹陽都

尉治正當斗分

天文志又云斗江湖牽牛婺女揚州此郡雖於古屬揚州然揚州地廣故特取地理志丹陽郡爲據

晉書天文志丹陽郡入斗十六度會稽郡入牛一

度按古丹陽歙縣地與會稽之富春接是斗牛之

交也自南斗十二度至婺女七度於次爲星紀於

辰在丑故此郡爲星紀丑南斗十六度

### 風俗

自虞夏以州論風土漢用戰國時封域大者兼星

以三二數連秦漢二十餘郡地廣則論其略後世

## 新安志

### 卷一

四

郡陋則俗亦別新安故秦二縣在山谷間地廣遠

自漢世常使丹陽都尉分治於此逮爲郡之後吏

治益詳又稍割其三陲以爲他郡益陋易治然其

人自昔特多以材力保捍鄉土爲稱其後寔有文

士黃巢之亂中原衣冠避地保於此後或去或留

俗益嚮文雅宋興則名臣輩出其山挺拔廉厲水

悍潔其人多爲御史諫官者山限壤隔民不染他

俗勤於山伐能寒暑惡衣食女子正潔不淫佚雖

饑歲不鬻妻子山谷民衣冠至百年不變自唐末

賦不屬天子驟增之民則益貧然力作重遷猶瘡於他郡比年多徙舒池無爲界中歛爲負郭縣其民之弊好委人事泥葬隴卜筮至擇吉歲市井列屋猶稍侈其門以僚吉嚮休宦俗亟多學者山出美材歲聯爲桴下淝河往者多取富女子始生則爲植櫛比嫁斬賣以供百用女以其故或預自蓄藏始秦黥地廣今更爲小縣俗淳儉績溪俗有二由徽嶺以南壤瘠賦重而民貧其北壤沃賦平人有餘則柔循然愚民嗜儲積至不欲多男恐子益

新安志

卷一

五

多而貲分始少蘇公謫爲令與民相從爲社民甚樂之其後里中社輒以酒肉饋長吏下及佐史至今五六十年費益廣更以爲病婺源阻五嶺其趨鄱陽徑易唐末常使總浮梁德興諸縣鹽權且專其兵與鄱通封疆則民俗近之前世賢吏多表其民之良以爲勸祁門水入于鄱民以茗漆紙木行江西仰其米自給俗重蠶至熏浴齋潔以飼之此其大凡也賢者察之以施化否則拂之更歸咎於俗